

प्रादेशिक समाचार  
आकाशवाणी जयपुर-अजमेर

26.03.2024

1850 बजे

- राज्य मांय लोकसभा चुनाव रा पैला दौर सारू पर्चा दाखिल करण रो काल आखिरी दिन-हाल ताई 50 पर्चा दाखिल करी ज्या।
- भारतीय जनता पार्टी उम्मीदवारां री छठी लिस्ट जारी कीनी- दौसा ऊं कन्हैयालाल मीणा अर करौली-धौलपुर सीट ऊं इंदु देवी जाटव ने टिकट दीनो।
- निर्वाचन आयोग राज्यां रा मुख्य निर्वाचन अहलकारां ने जोरदार गर्मी अर लू ऊं जुड़ी राय जारी कीनी।
- प्रदेश मांय गर्मी बधबा सागे केई ठोडां पारो औसत ऊं 2 ऊं 3 डिग्री सैल्सियस ऊंचो दर्ज करी ज्यो।

0000

लोकसभा चुनाव रा पैला दौर रा तैत राज्य री 12 सीटां सारू व्हे रह्या चुनाव लडबा बाबत पर्चा दाखिल करण रो काल आखिरी दिन है। राज्य मांय चुनाव रा ई दौर मांय हाल ताई 50 पर्चा दाखिल कर्या जा चुक्या है। आज न्यारी-न्यारी पार्टियां रा अर निर्दलीय उम्मीदवार पर्चा दाखिल कीना। आज नामपाना दाखिल करण वाळां मांय सीकर ऊं भाजपा रा उम्मीदवार सुमेधानंद सरस्वती, चूरू ऊं देवेन्द्र झाझड़िया अर नागौर ऊं ज्योति मिर्धा शामिल है। आं रे अलावा सीकर ऊं भारतीय कम्युनिस्ट पार्टी रा उम्मीदवार अमराराम अर अलवर ऊं बहुजन समाज पार्टी रा उम्मीदवार फजल हुसैन ई नामपाना दाखिल कीना। भाजपा री ओर ऊं सीकर अर नागौर मांय उम्मीदवारां रा पर्चा दाखिल करण री बगत मुख्यमंत्री भजन लाल शर्मा ई मौजूद रह्या। ई पाछे वे दोन्यूं ठोडां नामांकन सभा ने संबोधित कीना। सीकर री नामांकन सभा मांय मुख्यमंत्री कह्यो के राज्य मांय भाजपा री सरकार रा 100 दिन पूरा व्हेता-व्हेता पेपर लीक करण वाळां रे खिलाफ तेजी ऊं कार्रवाई सुरू कर दीरी ज्यी जो हाल ई चाल रही है। वे कह्यो के पेपरलीक रा मामला मांय शामिल सगळा लोगां रे खिलाफ कानून वां रो काम करेला।

.....

राज्य मांय लोकसभा चुनाव रा पैला दौर रा तैत भर्या जा रह्या नामपाना री जांच 28 मार्च ने करी जावेला। उम्मीदवार 30 मार्च ताई नाम पाछा ले सकेला। पहला दौर मांय प्रदेश मांय जयपुर समेत 12 निर्वाचन हलका मांय 19 अप्रैल ने वोट पड़ेला। दूजा दौर मांय प्रदेश री 13 लोकसभा सीटां माथे चुनाव सारू 28 मार्च ने अधिसूचना जारी करी जावेला अर 26 अप्रैल ने वोट पड़ेला।

0000

राज्य री 25 लोकसभा सीटां माथे चुनाव सारू खास सियासी पार्टियां भाजपा अर कांग्रेस घणखर सीटां माथे उम्मीदवारां रा नाम रो ऐलाण कर दीनो है। भाजपा आज राज्य री दो और सीटां माथे उम्मीदवारां रा नाम रो ऐलाण कर दीनो। आज जारी लिस्ट मांय दौसा ऊं कन्हैयालाल मीणा अर करौली-धौलपुर सीट ऊं इंदु देवी जाटव ने टिकट दियो ज्यो है। भाजपा दौसा ऊं मौजूदा सांसद जसकौर मीणा अर करौली-धौलपुर ऊं मौजूदा सांसद मनोज राजौरिया ने टिकट नी दीनो है। आज ऐलाण करी ज्या नामा सागे ई भाजपा प्रदेश री 25 मांय ऊं 24 सीटां माथे उम्मीदवारां रा नाम ऐलाण कर दीना है। अब केवल भीलवाड़ा सीट माथे उम्मीदवार रा नाम रो ऐलाण बाकी है। दूजी कानी कांग्रेस री ओर ऊं हाल ताई 22 सीटां माथे उम्मीदवारां रा नाम ऐलाण करी ज्या है। पार्टी सीकर सीट सहयोगी पार्टी भारतीय कम्युनिस्ट पार्टी अर नागौर सीट सहयोगी पार्टी राष्ट्रीय लोकतांत्रिक पार्टी-आरएलपी सारू छोड दीनी है। कांग्रेस हाल ताई बांसवाड़ा सीट ऊं उम्मीदवार रा नाम रो ऐलाण नी कीनो है।

00000

राज्य मांय निपख अर साफगोई सागे लोकसभा चुणाव करावण सारू निर्वाचन विभाग री ओर ऊं फर्जी खबरां अर नफरत फैलावण वाळा भाषण माथे निगरानी राखी जा रही है। प्रदेश रा मुख्य निर्वाचन अधिकारी प्रवीण गुप्ता बतायो के सोशल मीडिया माथे ईवीएम, कानून-व्यवस्था, मतदाता सूची अर वोट देवण समेत चुनाव प्रक्रिया अर वोट देवण वाळां माथे असर डालबा वाळी जाणकारियां माथे निर्वाचन विभाग निजर राख रह्यो है। गुप्ता बतायो के सोशल मीडिया माथे फर्जी खबरां गलत अर भ्रम फैलावण वाळी जाणकारियां ने रोकण सारू पुलिस रा करीब 80 अहलकार तैनात करी ज्या है जदके राज्य स्तर माथे पुलिस महानिरीक्षक शरत कविराज ने नोडल अहलकार बणायी ज्या है। जिलां मांय एडिशनल एस.पी. लेवल रा अहलकारां ने नोडल अधिकारी बणायी ज्या है।

0000

चुनाव आयोग लोकसभा चुनाव रा तैत सी-विजिल एप रे जरिए चुनाव ऊं जुड्या कामकाज माथे निजर राख रह्यो है। आ ऐप चुनाव आदर्श आचार संहिता नी मानण रा मामलां री रिकॉर्डिंग, रिपोर्टिंग अर निपटारा सारू है। ई एप रे जरिये चुनाव आदर्श आचार संहिता नी मानण रा मामलां मांय फोटो, वीडियो अपलोड कर र ऑनलाइन तरीका ऊं शिकायत दर्ज कराई जा सके है।

000

प्रदेश मांय लोकसभा चुनाव री तैयारी सारू न्यारा-न्यारा जतन कर्या जा रह्या है। सीकर मांय जिला निर्वाचन अधिकारी कमर चौधरी अर एस.पी. भुवन भूषण यादव संवेदनशील मतदान केन्द्रां रो दौरो कर र अहलकारां ने जरूरी व्यवस्थावां करण रा हुकम दीना। एस.पी. आं मतदान केन्द्रां माथे और पुलिस जाब्तो लगावण बाबत कह्यो। डूंगरपुर मांय दिव्यांगजन अर बुजुर्गा री मदद सारू विधानसभा हलकावार हेल्पलाइन नंबर जारी करी ज्या है।

0000

निर्वाचन आयोग राज्यां अर केन्द्र रा राज वाळा प्रदेशां रा मुख्य निर्वाचन अधिकारियां ने चुनाव री बगत जोरदार गर्मी अर लू रा आसार ने ध्यान राखता थकां परामर्श जारी कीनी है। आयोग गर्मी ऊं बचाव सारू राष्ट्रीय आपदा प्रबंधन अधिकरण री ओर ऊं जारी करी ज्यी सलाह साझा कीनी है। अधिकरण लोगां ने तेज तावड़ा मांय खास तौर ऊं दोपहरां 12 बज्यां ऊं दोपेरां पाछे 3 बज्यां ताई बाहर जावण ऊं बचबा री राय दीनी है अर जरूरी मात्रा मांय पाणी पीवण सारू कही ज्यो है। ई सागे ई बासी जीमण ऊं परहेज करण री राय ई दीरीजी है। आयोग मुख्य निर्वाचन अहलकारां ने मतदान केन्द्रां माथे पीवण रा पाणी अर छाया रा सुबीता मुहैया करावणो तैय करण रा हुकम दीना है। निर्वाचन आयोग कानी ऊं जारी परामर्श रे मुजब मौसम विभाग उनाळा मांय सामान्य ऊं बत्तो तापमान रेहवण रा आसार जताया है, ज्यीं कारण मार्च ऊं जून बीचे लंबा बगत ताई तेज गर्मी अर लू रा हालात रह सके है।

000

लोकसभा चुनाव सारू प्रदेश मांय मतदान प्रतिशत बधावण बाबत निर्वाचन विभाग लगातार कोशिश कर रह्यो है। इण मांय बत्ता ऊं बत्ता मतदातावां री भागीदारी तय करण सारू न्यारा-न्यारा कार्यक्रम राख्या जा रह्या है। श्रीगंगानगर रा रायसिंहनगर अर करणपुर विधानसभा हलकां मांय जागरूकता रैली निकाळी ज्यी अर लोग एक-दूजा रा हाथ पकड़ र चेन बणा र बत्ता ऊं बत्ता मतदातावां ऊं वोट देवण री अपील कीनी। जोधपुर जिला रा धवा मांय आंगनबाड़ी कार्यकर्ता, साथिनां अर राजीविका समूह री महिलावां रैली निकाळ र बत्ता ऊं बत्ता मतदातावां ऊं वोट देवण री अपील कीनी। सवाईमाधोपुर रा बूथ नम्बर 164 नयापुरा की ढाणी मांय स्वीप कार्यक्रम रे जरिये वोट देवण वाळा ने बिना डर्यां वोट देवण सारू सरकार री ओर ऊं पूरी मदद रो भरोसो दिरायी ज्यो।

0000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

000

प्रदेश मांय आज ई केई ठोडां रंग-गुलाल ऊं होळी खेली ज्यी। सिरोही जिला रा पिंडवाड़ा मांय आज लोग एक-दूजा रे रंग-गुलाल लगा र होळी री शुभकामनावां दीनी। डूंगरपुर जिला रा सागवाडा मांय आज गोबर रा कंडां री राड व्ही। इण मांय नौजवानां री 2 टोलियां एक दूजा माथे छाणा फैंक र होळी खेली। ई बीचे पुलिस रा अहलकार अर कर्मचारी आज होळी खेली। भीलवाड़ा री पुलिस लाइन मांय पुलिस रा जवानां री होळी रो कार्यक्रम राख्ही ज्यो, जिण मांय पुलिस वाळा एक दूजा रे गुलाल अर अबीर लगायो। डूंगरपुर मांय एस.पी. मोनिका सैन समेत पुलिस रा जवान अर अहलकार होळी खेली। कोटा मांय रेंज आई.जी. अर एस.पी. जवानां सागे होळी खेली। बूंदी मांय ई पुलिस रा अहलकार अर कर्मचारी पूरा उमाव सागे होळी खेली। उदयपुर मांय ई पुलिस वाळा पूरा उमाव सागे होळी खेली।

0000

राज्य मांय बत्तो ऊं बत्तो तापमान औसत ऊं 2 ऊं 3 डिग्री सेल्सियस ऊंचो व्हेवण ऊं गर्मी रो असर बधबा लाग्यो है। मौसम विभाग रे मुजब लारला 24 घंटां मांय सब ऊं ऊंचो 39 दशमलव 6 डिग्री सेल्सियस तापमान फलौदी मांय दर्ज करी ज्यो। जालौर मांय 39 अर बाड़मेर मांय 38 दशमलव 9 डिग्री सेल्सियस अधिकतम तापमान दर्ज करी ज्यो। प्रदेश मांय केई ठोडां दिन री बगत तापमान 36-37 डिग्री दर्ज करी ज्यो। मौसम विभाग आवता 48 घंटां मांय अधिकतम तापमान मांय 2 ऊं 3 डिग्री सेल्सियस री बधोतरी रा आसार जताया है। महकमो काल अर 28 मार्च ने जोधपुर संभाग मांय कठे-कठे अधिकतम तापमान 40 ऊं 42 डिग्री सेल्सियस बीचे रेहवण रा आसार जताया है। महकमा रे मुजब 29 अर 30 मार्च ने बीकानेर संभाग अर शेखावाटी हलका मांय कठे-कठे हल्की बिरखा रा आसार है।

0000